

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- नेशनल कांफ्रेंस विधायक दल दे नेता उमर अब्दुल्ला होरें आखेआ ऐ जे नमी सरकार दा शपथ ग्रैहण समारोह 16 अक्टूबर गी होग।
- 2- उपराज्यपाल मनोज सिन्हा होरें जम्मू-कश्मीर थमां केंद्री शासन हटाने दी सफारश कीती ऐ।
- 3- उपराज्यपाल होरें आखेआ ऐ जे भारतीय वायु सेना दा दलेरी ते बलिदान दी परम्परा दा इतिहास ऐ। देश दी सेवा ते विपदा च फंसे दे लोकें दी मदद दा जज्बा वायु सेना दे कर्मिं दी रगें च ऐ।
- 4- रक्षा मंत्री राजनाथ सिंह होरें जम्मू-कश्मीर ते लद्दाख च कई सड़कें ते पुलें दा वर्चुअल ढंगें नै उद्घाटन कीता। मनोज सिन्हा होरें आखेआ जे नमिं परियोजनाएं कन्नै जम्मू-कश्मीर च सैलसफा ते रोजगार सृजन च सकारात्मक नतीजे सामने औडन।
- 5- ते मुखै दे बाकी हिस्सैं आला लेखा जम्मू-कश्मीर च बी कल दशैहरे दा ध्यार पारम्परिक श्रद्धा ते उत्साह कन्नै मनाया गेआ।

<><><><><><>

Omar-Oath

नेशनल कांफ्रेंस दे उप प्रधान ते नेशनल कांफ्रें से विधायक दल दे नेता उमर अब्दुल्ला हारें आखेआ ऐ जे नमीं सरकार दा शपथ ग्रहण समारोह बुधवारें सारी लोड़चदी औपचारिकताएं गी पूरा करने मगरा कीता जाग। बखशी स्टेडियम च लैजेंड्स लीग क्रिकेट दे मैच दे बाहरें पत्रकारें कन्नै गल्ल करदे होई उनें आखेआ जे शपथ ग्रहण समारोह थ्वां पैहले किश प्रक्रियाएं गी पूरा कीता जाग। औहदे मगरा शपथ ग्रहण समारोह होग। उनें आखेआ जे पिछले 7 बरें थ्वां जम्मू-कश्मीर च राष्ट्रपति शासन ऐ, उसी खत्म करने लेई किश प्रक्रियां न। उनें गलाया जे किश औपचारिकता हुंदियां न। लोड़चदे कागज पत्र उप्पर उप राज्यपाल होरें गी सोंपे गए न ते औहदे मगरा छुट्टियां हियां। उनें मेद जाहिर कीती जे सोमवार तगर औपचारिकताएं गी पूरा कीता जाग। मंगलवार तगर तैयारियां करी लैतियां जाडन ते बुधवारें शपथ ग्रहण समारोह होग।

<><><><><><>

LG-President Rule

जम्मू-कश्मीर च नमीं सरकार बनाने लेई बत पदरी करदे होई उपराज्यपाल मनोज सिन्हा होरें केंद्र शासित प्रदेश थमां केंद्री राज हटाने दी सफारश कीती ऐ तां जे इत्थे उमर अबदुल्ला हुंदी अगुवाई च नमीं सरकार अपना कम्मकार साम्भी सकै। जिनें जंदे शुक्रवारें उपराज्यपाल होरें गी मिलिए कांग्रेस ते किश होर पार्टिएं दे सहयोग कन्नै सरकार बनाने दा दावा पेश कीता हा। 19 जून 2018 गी महबूबा मुफ्ती हुंदी अगुवाई आहली गठबंधन सरकार दे डिग्गी जाने दे बाद केंद्री गृह मंत्रालय नै इत्थे राष्ट्रपति शासन लागू कीता हा। पैहले किश चिरै लेई विधानसभा गी स्थगित रक्खेआ गोआ ते मगरा उस्सै बरे नवंबर म्हीने भंग करी दिता गोआ। 90 मिम्बरी

जम्मू-कश्मीर विधानसभा लेई चुनां दी प्रक्रिया 10 अक्टूबर गी मुकम्मल होई ऐ जेदे च 42 सीटां हासल करियै नेशनल कांफ्रेंस सब्बनें शा बड्डी पार्टी दे तौरा पर उभरिये सामने आई ऐ। एहदे अलावा कांग्रेस दिएं 6, सीपीआई (एम) दी इक, इक आम आदमी पार्टी ते किश अजाद मेदवारें दे समर्थन कन्नै नेशनल कांफ्रेंस कश सरकार बनाने लेई लोड़चदे बहुमत कोला मतियां सीटां होई गेदियां न।

<><><><><><>

LG-Vayu

उपराज्यपाल मनोज सिन्हा होरें भारतीय वायु सेना आस्सेया आयोजित वायु वीर विजेता कार रैली गी झंडी दस्सिए रवाना कीता। एहदे च उत्तराखंड वार मेमोरियल दे साबका फौजी बी सहयोग करा रदे न। उपराज्यपाल होरें सब्बनें प्रतिभागिएं गी शुभकामनां दितिया। उनें आखेआ जे भारतीय वायु सेना दी दलेरी ते बलिदान दी परम्परा दा इतिहास ऐ। देश दी सेवा ते मुसीबत च फसे दे लोकें दी मदद दा जज्बा वायु सेना दे कर्मिएं दी रगें च ऐ।

<><><><><><>

LG-MP

बारामूला थ्वां सांसद अब्दुल राशिद शेख होरें कल उपराज्यपाल मनोज सिन्हा हुंदे कन्नै राजभवनच मलाटी कीती। उनें उपराज्यपाल होरें गी बारामूला संसदीय हल्के कन्नै जुड़े दे विकास सरबंधी बक्ख-बक्ख मामलें ते लोकहित कन्ने जुड़े दे पैहलुएं ते मामलें बारै चर्चा कीती। जम्मू-कश्मीर जनता दल यूनाइटेड दे प्रधान जी. एम शाहीन होरें बी उपराज्यपाल हुंदे कन्नै मलाटी कीती। उनें बी उपराज्यपाल हुंदे कन्नै लोकहित कन्नै जुड़े दे कई मामलें गी पुट्टेआ।

मगरा कश्मीर चेंबर ऑफ कामर्स एंड इंडस्ट्री दे प्रतिनिधिमंडल नै अपने अध्यक्ष जावेद अहमद हुंदी अगुवाई च उपराज्यपाल हुंदे कन्नै राजभवन च मलाटी कीती।

<><><><><><>

PM-Internship

प्रधानमंत्री इंटरनशिप स्कीम लेई पंजीकरण कल्लै थमां रम्भ होई गोआ ऐ। पंजीकरण आनलाइन पोर्टल PM internship.mca.gov.in पर कीता जाई सकदा ऐ। पंजीकरण 25 अक्टूबर तगर कीता जाई सकदा ऐ। प्रधानमंत्री इंटरनशिप योजना तहत 123 कंपनियें तकरीबन 91 इंटरनशिप दे मौके प्रदान कीते न। सरकार दा लक्ष्य इस माली बरे च सवा लकख इंटरनशिप दे मौके प्रदान करना ऐ। इस परियोजना पर 800 करोड़ रपे दी लागत ओगं सरकार नै 5 बरै दौरान 21 थमां 24 बरे दी बरेसू आहले 1 करोड़ मेदवारें गी एह इंटरनशिप उपलब्ध करोआने दा लक्ष्य रक्खे दा ऐ।

<><><><><><>

Pak-Section 144

पाकिस्तान च पंजाब सरकार नै रावलपिंडी च कन्नू बस्था गी बनाए रखने आस्तै 17 अक्टूबर तगर दफा 144 लागू करी दिती ऐ। एह फैसला राजधानी इस्लामाबाद च 15 ते 16 अक्टूबर गी लग्गने आहले शंघाई सहयोग संगठन एससीओ दे सम्मेलन दी पछोकड़ै च लैता गोआ ऐ। पाकिस्तान दी दफा 144 सरकार गी इजाजत दिंदी ऐ जे ओ कुसै बी चाल्ली दे सियासी जलसे रैली कड्डने, धरने प बौहने, प्रदर्शन करने ते कुसै बी चाल्लीद दे किट्ठै पर रोक लाई सकै। रावलपिंडी च एह बंदशां 14 अक्टूबर तगर रौह्रगन। तोआई एससीओ दी बैठक गी ध्यानै च रखदे होई इस्लामाबाद च फौज दी तैनाती कीती गई ऐ। केंद्र सरकार नै इस्लामाबाद च 5

अक्टूबर कोला 17 अक्टूबर तगर संविधान दी दफा 245 तहत कन्नून बवस्था बनाई रखने ताई फौज दी तैनाती कीती दी ऐ। अधिकारियें इस्लामाबाद ते रावलपिंडी दौनें शहरें च 5एं दिनें लेई सब्बै जंज घर, रेस्तरां, कैफेटेरिया बी बंद रखने दे निर्देश जारी कीते न। भारत दे विदेश मंत्री डाक्टर एस. जयशंकर होर बी एससीओ दी बैठका च हिस्सा लैने ताई पाकिस्तान जा करदे न।

<><><><><><>

Rajnath

रक्षा मंत्री राजनाथ सिंह होरें कल वर्चुअली बीआरओ आस्सेया बनाए गेदे 75 प्रोजेक्टें दा उद्घाटन कीता। इंदे च ज्यादातर शिड़क ते पुल शामिल न। इनें प्रोजेक्टें चा 19 जम्मू ते कश्मीर च न ते 11 लद्दाख च। प्रधानमंत्री हुंदे दफतरै च राज्यमंत्री डॉ. जतिंद्र सिंह, उपराज्यपाल मनोज सिन्हा, लद्दाख दे उपराज्यपाल ब्रिगेडियर रटैर बी.डी. मिश्रा होरें सांझे तौर पर इनें प्रोजेक्टें दा उद्घाटन कीता। जिनें प्रोजेक्टें दा उद्घाटन होआ, उंदे च 7 शिड़कां ते 12 पुल जम्मू ते कश्मीर च ते लद्दाख च 2 शिड़कां ते 9 पुल न। राजनाथ सिंह होरें बिश्नाह-कौलपुर-खोजीपुर शिड़क, बसोहली-बनी-भद्रवाह शिड़क, चनैनी पुल, धार-उधमपुर शिड़क शामिल ऐ, दा उद्घाटन कीता। इस मौके पर बोलदे होई सिंह होरें बीआरओ दी दूर-दरेडे इलाकें च राबता कायम करने प्रति बचनबद्धता गी दोहराया। उनें आखेआ जे पिछले 5 बरें च बीआरओ नै 450 ढांचागत परियोजनां 16 ज्हार करोड़ थवां बद्द रपे कन्नै पूरियां कीतियां न।

<><><><><><>

LG-Development

उपराज्यपाल मनोज सिंहा होरें जम्मू-कश्मीर च महत्वपूर्ण सड़कें ते पुलें दे निर्माण लेई प्रधानमंत्री नरेंद्र मोदी, रक्षा मंत्री राजनाथ सिंह ते सरबंधित होरनें मंत्रालयें ते संगठनें दा आभार प्रगट कीता ऐ जिंदा कल राजनाथ सिंह होरें वर्चुअल ढंगे नै उद्घाटन कीता। उनें आखेआ जे एह ढांचागत विकास सिविल ते सैन्य प्रशासन लेई बड़ा महत्वपूर्ण ऐ ते जम्मू-कश्मीर दे दूर-दरेडे इलाकें तोड़ी सड़कें राएं सखल्ली पुज्ज यकीनी बनने कन्नै एह सड़कें दे पुल दूर-दरेडे ते पछड़े दे इलाकें दे समाजी आर्थिक विकास च बी मते कारी दे साबत होंगन। इन्ना गै नेई इंदे नै सैलसफा गी बढ़ावा थहोग, कम्म-रोजगार दे नमें ते मते-मते मौके थहोंगन, समाज च आर्थिक विकास ते खुशहाली औग ते लोकें दे जीवन स्तरै गी उबड़ा चुक्कने च बी मदद थहोग। एल.जी होरें आखेआ जे एहदे नै भारतीय फौज ते होरनें सुरक्षा बलें दी आओजाई ते कम्म-कारवाइएं च बी सखाल होग।

<><><><><><>

Dussehra

मुख्ये दे बाकी हिस्सें आला लेखा दशैहरे दा ध्यार कल समूलचे जम्मू-कश्मीर च मते जोश ते जज्बे कन्नै मनाया गेआ। जम्मू दा सब्बनें शा बड़डा समारोह शैहरे दे परेड ग्राउंड च लोआया गेआ जित्थे रावण, कुम्भकरण ते मेघनाद दे पुतले दे अलावा रावण दी लंका दा बी दहण कीता गेआ। इस ध्यार गी बुराई पर अच्छाई दी जित्त दे रूपै च मनाया जंदा ऐ। जहारां बद्दे लोक इस समारेह च मजूद हे। सांसद जुगल किशोर शर्मा, इस मौके मुख परोहने हे। जय श्री राम दी जयघोष कन्नै रावण ते लंका दहन कीता गेआ। एहदे शा पैहले परेड ग्राउंड च पारंपरिक पूजन बी कीता गेआ। तोआई श्रीनगर च बी दशैहरे दे मौके पर कल चर्च लेन कश क्रिकेट स्टेडियम च इक बड़डे समारोह दा सरिस्ता कीता गेआ जित्थे साबका मुखमंत्री ते नेशनल

कांफ्रेंस दे अध्यक्ष डॉ. फारूक अब्दुल्ला हुंदे अलावा पुलस ते सिविल प्रशासन दे कई बड्डे अधिकारी बी मजूद हे। विजय दशमी दे मौके पर राष्ट्रीय स्वयंसेवक संघ दे कार्जकर्ताएं मुल्खै दे बकख-बकख हिस्सें च शस्त्र पूजन बी कीता।

<><><><><><>

India-UNICEF

संयुक्त राष्ट्र बाल कोष यूनिसेफ नै आखेआ ऐ जे भारत वैश्विक सतह पर बच्चें आस्तै संगठन सेहत ते खाने-पीने आली चीजें सरबन्धी सहायता ते सप्लाई उपलब्धकरोआने आला ब्रहया मुल्ख ऐ। भारतीय कारोबारिएं अपने वैश्विक कम्में आस्तै यूनिसेफ गी लगभग 6 बिलियन डालर दी लागत दियां चीजां ते सेवाएं दी आपूर्ति कीती ऐ। भारत दी पैहली अधिकारिक यात्रा करने आली यूनिसेफ दी आपूर्ति विभाग दी निदेशक होरें आखेआ जे बच्चें आस्तै जीवन रक्षक चीजें ते सेवाएं दी आपूर्ति करने आहले भारतीय प्रदाता दुनिया भरै दे बच्चें आस्तै यूनिसेफ दे कम्में दा महत्वपूर्ण हिस्सा ऐ। उनें आखेआ जे एह योगदान ना छड़ा भारत सगुआं दुनिया भरै दे वंचित बच्चें दा जीवन बचाने दे यूनिसेफ दे अभियान दा मुख्क हिस्सा ऐ।

<><><><><><>